



GülleWaggis Fasnacht 2024 **Sujet: Z Basel danzt dr Doot**

Unter Dächer und unter Schtoore
gseht me Defibrillatoore.
Wurd Dyy Bumbby schtoppe sette,
kha das Gräät Dy Lääbe rette!
E „Wumms“ mit Schtroom und scho isch s soo:
Bisch glaade zrug in s Lääbe kho.

Im Mittelalter het me das nid kennt
und isch em Sänsemaa drvoo grennt.
Är het ys trozdam unverhoole
yyghoolt und uns s Lääbe gschoole.
S het no kai Schtroom gäh – und drum „bumms“:
Bisch halt gschorbe ohny „Wumms“.

Hit het me zem Gligg noo lange Schtunde
fir dye Probleem dr Schtroom erfunde.
Doch s git none andre Doot – ihr liebe Lyt:
Do nutz au dr Defibrillatoor nyt!

Wie wettsch mit Schtroom no unsry Baize
troz Schtärbe no zem Lääbe raize?
Will d Baizer kenne nid iberlääbe,
wenn sy sich ans Büffet klääbe...
Doo kha doch numme ebbys nitze:
Me muess die Schtärbende unterschitze!

Dr Kanton git im groosse Ganze
Gäld ans Theater, wo sy denn dien danze...
...natyyrlig blutt – also ganz „natur“.
Das nennt me z Basel denn „Kultur“.
Khasch ainy in dr Wäbergass entdegge,
gheert sy - falls blutt – in Schmuddelegge.

Gosch in d Baiz und duesch nid am „Cüpli“ hange,
sondern suffsch am Schtammtisch „nur“ e Schtange,
schoosch als doofe Daggel doo,
will d Baiz wäge Dir in Konkurs muess goo..
Esoo muesch z Basel regyschtryere:
S duet allewyl numme s Gäld regyere.
Und wenn das fäählt, khasch gseh, wie s s goht:
In Basel danzt nur no dr Doot!

Zum Gligg hän mr jetzte für s groosse Ganze
e Neue z Bärn wo duet Janzig danze:
Är wird derte fir uns Basler wärbe,
dass nid Alles dr Doot muess schtärbe.
Und wenn är s nid schafft, unsry Schulde zaahle,
gits jo in vier Joohr neiy Waahle.

Aber schlimmer isch nid nur s Finanzielle:
Mr schtärbe meh no im Generelle.
Mr stärke laider au schportlig gseh:
Mir saage doo numme „FCBee“.
Und wenn das soo wytter goht,
danzt au im Joggeli dr Doot.

Aber so, wie mir das dien duurezieh:
In Basel döötelet d Fasnacht nie!
Und wotsch DU es Schtärbe rette in unsrer Ärde:
Muesch aifach PassyyvMitglied by uns Güllis wärde.